

Uunga siunnersuut Kalaallit Nunaanni aningaasanik nuussinermi paasissutissat ilanngullugit nassiunneqartarnissaannik inatsisip allanngortinneqarnissaa pillugu inatsisissatut siunnersuut.

(Aningaasaqarnermut Akileraartarnermullu Naalakkersuisoq)

Saqqummiussissut

Siullermeerinnineq

Inatsisartunut aalajangiiffigisassatut matumani siunnersuut Naalakkersuisut sinnerlugit saqqummiuppara.

Naalagaaffimmi oqartussaasut aningaasanik nuussinermi paasissutissat ilanngullugit nassiunneqartussat pillugit Kalaallit Nunaannut inatsit Namminersorlutik Oqartussanut saqqummiuppaat. Aningaasanik nuussinermi peqqussutit pingajuattut taaneqartup Kalaallit Nunaannut atortussanngortinneqarnissaa inatsimmi siunertaavoq.

Aningaasanik nuussinermi peqqussutit pingajuanni malittarisassat maanna Aningaasanik nuussinermi peqqussut atuuttoq, inatsisikkut nr. 326 2019-imeersukkut Kalaallit Nunaannut atortussanngortinneqartoq taarserpaa.

Peqqussummi malittarisassat inatsisinik unioqqutitsisumik aningasanik peqquserluutinik malunnarunnaarsaanermik pinngitsoortitsinissamik ilaatigut siunertaqarpoq, soorlu inatsisinik unioqqutitsilluni ikiaroorartunik tuniniaanermi isertitanik kiisalu aningaasanik nassitsisut tiguisusallu pillugit akiliinermik isumaginnittut paasissutissanik nalunaarsuisussaataanerisigut pinerlunnianik aningaasalersuinermik pinngitsoortitsiniarnissamik siunertaqarput. Malittarisassani maanna kryptonik kiffartuussisut pigisanik nalilinnik kryptonik nuussinemat ilaatilerlugu annertusineqarnerat, aningaasanik nuussinermi peqqussutit pingajuanni nutaartaavoq. Tassa illuatungeriit pigisanik nalilinnik kryptonik niuerfinnik ingerlatsisut, toqqortaqtartut allallu kryptonik pigisaannik nalilinnik ingerlaatsisut imaluunniit kryptonik pigisanik nalilinnik aningaasanillu allanik imaluunniit kryptonik pigisanik nalilinnik ingerlatsisut, siunissami malittarisassanut ilaatinneqalissapput.

Aningaasanik nuussinermi peqqussut nunani EU-mut ilaasortani ulloq 30. december 2024 atuutilissaaq. Kalaallit Nunaanni ulloq taanna malittarisassat atuutilernissaat siunnerfigineqarpoq.

Malittarisassat ullormi tassani atuutilinngippata, tamanna nunatsinni aningaaserivinnik ilungersunartorsioortitsisinnaavoq, Kalaallimmi Nunaat aningaasanik nuussinermut atatillugu nunatut isumaqatigiissutip avataaniittutut isigineqalissammat. Taamaattoqassappat

ullumikkornit Kalaallit Nunaannut Kalaallit Nunaannillu aningaasanik nuussinermi
paasissutissat amerlanerusut ilanngullugit nassiunneqartarnissaannik
piumasaqaateqartoqalissaaq, tamannalu inuinnarnut namminersorlutillu inuussutissarsiortunut
nuussisarnernik ajornarnerulersitsissaaq.

Taamaammat aalajangiiffigisassatut siunnersuutip ataatsimiinnermi siusissukkut
suliarineqartussanngortinneqarneranik Naalakkersuisut sinnerlugit Inatsisartut
Siulittaasoqarfiat qutsavigissavara.

Taamatut oqaaseqarlunga aalajangiiffigisassatut siunnersuut Inatsisartunut
suliarineqartussanngortippara.